

Naqqiut 2

Siusinnerusukkut 26. oktober 2016-imi nassiunneqarsimasumut taartaasoq.
(*Naalakkersuisup taaguutaa allanngortinneqarpoq naalakkersuisoqarfii
allanngortinneqarnerisa kingunerisaanik*)

**Nukissiorfinni Innaallagissamut, imermut kiassarnermullu assigiimmik
akeqartitsinerup atuuteqqilersinnaanerata kingunerisinnaasai aammalu
malitsigisaasussanut sunniutaasussat misissoqqissaarnerat nalilersorneqarnerallu
pillugit nalunaarusiamik UKA2017-imi saqqummiusseqqullugit Naalakkersuisut
peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Immanuelen, Siumut)

Akissuteqaat

(Inuussutissarsiornermut, Suliffeqarnermut, Niuernermut, Nukissiuuteqarnermut
Nunanullu Allanut Naalakkersuisoq)

Siullermeerneqarnera

Naalakkersuisut sinnerlugit Siumumit Inatsisartunut ilaasortaq, Jens Immanuelen,
aalajangiiffigisassatut siunnersuuteqarneranut qutsavigaara.

Innaallagissamut, imermut kiassarnermullu akinik aalajangersaariaatsip maanna
atorneqartup allanngortinneqarnissaa pisariaqartoq Naalakkersuisut isumaqataapput.
Akinik aalajangersaariaaseq maanna atorneqartoq nunatsinni sumiiffinni assigiinngitsuni
innuttaasut akornanni akinik annertuumik assigiinngisitsiviuvoq pisariaqanngitsumillu
pisariulluni. Innaallagissamut, imermut kiassarnermullu akit nammaqatigiiffiusumik
naapertuuttumillu tunngaveqarluni atuutsinneqalernissaat Naalakkersuisut pingaartippaat.
Naalakkersuisut taamaalillutik ilaqutariinnut tamanut naligiinnerusumik
atugassaqartitsilissapput.

Suliami ingerlasumi assigiilluinnarnik akeqartitsinerup imaluunniit paarlattuanik akinik
naligiinnerusunik atulersitsinissap kingunerisassai nalilersuiffigineqarput. Nalilersuinerit
taakku aalajangiiffigisassatut siunnersuummi siunnersuutigineqartutut
saqqummiunneqarnissaat pissusissamisoorluinnarpoq. Nukissiuutinut akit allatigut aamma
allanngortinneqarsinnaapput. Taamaattumik kiassarnermut akit uuliamut akigititaasunut
toqqaannartumik atatinneqartarnerannik atorunnaarsitsisoqassanersoq Naalakkersuisut
misissussavaat.

Ungasianiit kiassarnerup aamma innaallagissamik kiassarnerup kiassaatinut uuliatortunut immikkoortunut unammillersinnaanissaat, taamaalillutalu nukissiuutinik mingutsitsinngitsunik pilersuineramik siuarsaanissarput pingaaruteqarpoq.

Allannguutissaq Naalackersuisut misissugassaat alla aningaasanut, ullumikkut innaallagissamik, imermik kiassarnermillu sullissinerit akornanni agguaaqqinneqartartunut tunngasuuvoq. Sullissinerit taakku akornanni agguaaqqittarnerup peerneqarneratigit suliat ullumikkornit pisariinnerujussuannngussapput paasiuminarnerujussuannngussallutillu. Tamatumalu peqatigisaanik kiassarnermut akit appasinnerulissapput, aammalu innaallagissamut imermullu akit ataatsimut isigalugit qaffasinnerulissallutik. Taamatut allannguinermi atuisut ataasiakkaat innaallagissamik imermillu pitsaanagerusumik atuinissamut kajumissaarneqassapput, soorlu tunisassianik nukissiuutinik sipaartunik atuinissamut, imermik sipaarnissamut il.il.

Ataatsimiinnermi matumani oqaluuserisassami allami aamma Jens Immanuelen, Siumut nukissiuutinut akit pillugit aalajangiiffigisassatut siunnersuuteqarpoq (UKA 2016/30). Siunnersuut taanna innaallagissamut imermullu akinik appasissunik, ullumikkut nunami aalisakkeriviit akilertagaannik atuisinnaanerup annertusinissaanut tunngasuuvoq. Qulequtaq taanna aamma Naalackersuisut nukissiuuteqarnermi akit ilusissaannut nutaanut siunnersuusionerminnut atatillugu sammivaat.

Nukissiuuteqarnermi akit ilusaasa ilaannik allannguivut tamarmik, akit ilusaanni immikkoortunut allanut sunniuteqartartussaapput. Taamaattumik akit ilusaannut nutaanut siunnersuutit assigiinngitsut tamaasa siunnersuummut ataatsimoortumut kattullugit inersuarmi matumani suliarineqarnissaat naapertuutissaq. Nukissiuuteqarnermi akit ilusaannut nutaanut siunnersuutip ataatsimoortup 2017-imi Ukiakkut Ataatsimiinnermi saqqummiunneqarnissaat Naalackersuisut naatsorsuutigaat. Nukissiorfinni assigiinnik akeqartitseriaatsimik atuutsitseqqilernerup kingunerisassai, kiisalu tamatumani sunniutinik misissueqqissaarneq naliliinerlu pillugit nassuiaatip najoqqutassanut ataatsimoortunut, Naalackersuisut nukissiuuteqarnermi akit ilusaannut nutaanut aalajangiiffigisassatut siunnersuutaannut saqqummiunneqartussamut ilaatinneqarnissaa pissusissamisuussaaq.

Naalackersuisut siuliani oqaaseqaatit tunngavigalugit oqallittoqarluarnissaa kissaatigaat, aammalu aalajangiiffigisassatut siunnersuutip akuerineqarnissaa inassutigalugu.